

四庫全書

集部

欽定四庫全書

集部
稿李詩繫卷二十四

詳校官侍講_臣王燕緒

主事銜_臣徐以坤覆勘

總校官進士_臣朱鈐

校對官修撰_臣吳錫齡

謄錄監生_臣葉大奇

欽定四庫全書

樵李詩繫卷二十四

平湖沈季友編

國朝

秋槐老人王翊

翊字介人嘉興梅里人家故業漆日坐闌閣間一手挾古今書以觀一手數錢與市販菜傭相應答飲少而嗜酒屏絕慶弔自處名教外為詩文高自

矜許好製詞曲作紈扇記忌者誣以詆毀里紳訟
之官家計日落然詩日益有名既遭兵亂多感憤
嘆咤見之篇章張深之北方名賢僨居南湖每置
酒召客伎樂雜陳栩輒散髮赤足叫呼號嘯雖嚴
客無所避人多以禰正平杜子美目之遊山陰與
陳章侯善王季重見其詩嗟賞焉陳卧子作序謂
有盛唐之風其舊作曰春槐堂集後作曰秋槐堂
集共千餘首壬辰舟次贛州被盜皆沒於水深自

痛惜每終夜擁被記憶後入粵惘惘自失復撫拾
記聞作詩二百餘首買舟而北其稿又為鼠噉不
可綴補益不樂四月泊京口無疾而卒友人朱彝
尊曾有選抄一帙其弟王庭梓之以傳謂其風尚
沈雄間為和厚幽淡之句不可一類求也

田園偶作

落日閉窮巷風雨何颼颼沈吟坐來久悄然生百憂自
傷曠浪懷苦為衣食謀朝看孤雲飛暮見空江流何能

坐成老拔劍當遠遊草草天下人視我如贅瘤

宿董氏山房

中夜虎渡水溪樹初風生颯颯吹哀湍衆山皆有聲深
庭久無月黯然三四星憂人獨求醉釋此離居情

牧牛詞

二月三月春雨晴渚田水暖芹芽生牧童驅牛出原隰
細草青青牛可食夕陽短笛不見人吹過邨南又邨北
人有謂余老者感作

一身不遇家屬空談詩說劒心何雄少年雖去壯還在
出門千里輕飛蓬飲酒多歡俠遊子尋花常宿倡樓中
半生為樂不知病兩耳忽患今春聾梳頭遂見髮初短
照面恰怪顏無紅往還後生最輕薄笑云似爾當稱翁
繁華零落盡朝菌吟嘆啾唧來秋蟲天地那能禁我老
文章可惜令人窮一丘一壑幾時住世上豈有真喬松

寄沈十二

橫山生白雲鬱鬱半空起知君住其下獨宿白雲裏冬

月靜巖扉寒泉滌心耳嗟余役風塵引領望之子

越中送顧偉南

相憐俱在客感別此心同前路夕陽外行人春草中到家聞唳鶴去櫂逐歸鴻欲望雲間遠長懷泖水東

石城晚眺

客心正搖落獨上石頭城天遠垂垂下江寒混混平柳條南北路桃葉古今情況值秋風後清砧急暮聲

自感

窮老心還拙衰年鬢復斑文章身後事丘壠夢中山遂
欲東浮海不然西出關桃源如可問但去莫須還

答范遵甫

濁酒空懷田舍歌百年身世半蹉跎人歸野徑殘陽盡
家在寒塘落葉多好竹不嫌愁裏看名山竊喜夢中過
餘生欲逐漁樵去白髮于今奈老何

與客話左寧南事

長城萬里羨當年楚澤軍容益世傳三月晴風高戰鼓

九江春水下樓船
韓彭心事應難論
李郭勲名不易全
漫道勤王師獨正
江南處處起風煙

會稽竹枝

荷葉荷花十里勻
秋風吹滿越溪春
漾舟谿上多遊女
誇道西施是越人

漂母祠

一飯當年報不遺
王孫今日更何之
平生自嘆無知己
千里來尋漂母祠

客中九日

細雨成陰近夕陽
湖邊飛閣照寒塘
黃花應笑關山客
每歲登高只異鄉

宮詞三首

金雀傳餐百尺樓
玉壺催酒醉春遊
內中新有良家選
背著君王學打毬

春半櫻桃萼尚含
中宮初命采金鹽
近前公主才能語
置膝親教誦二南

禁中春樹藹晴煙朝罷簾聲下九天官局進呈新鑄好
六宮齊賜草書錢

姚秀才清

清字永伯號毅齋晚號晦菴太傅思仁孫

輓總憲劉公宗周

元老猷能壯天胡不慙遺鞠躬忘利鈍注意任安危直
道輕三黜深憂陸十思時窮梁木壞臣紀獨肩仔

丹徒道上有感

綠綺青萍泛水涯
灩灩零露改蒼葭
秋原禾黍閒犁犢
古陌松杉噪暝鴉
斷井荒碑何代事
寒煙野草幾人家
十年舊恨渾如夢
拾穗行歌盡可嗟

陸秀才深原

深原字嗣長號芝石
平湖人性伉直不能昵俗當
弟昆貴盛時泊如也

國初棄諸生以詩酒自娛
有覆硯齋集

過顧茂長丹室

記否髻年君已翁不堪華鬢又君同交從意氣由來淡
老共披離不厭濃正好破除杯酒內幾番感咤百年中
荒蕪留得琴書在莫愛追隨河上公

高秀才維城

維城字百雉嘉興諸生其佳句有月色水鋪地雁
聲秋滿天蕭然行李桃花渡何處佳人燕子樓為
時所稱

桃蹊口占

水際天桃紅映白移家欲住武陵源道人笑我多牽殢
此是陶潛紙上言

寄廬先生施洪烈

洪烈字仲芳號寄廬平湖人少受知於學使洪承
疇順治乙酉以明經授欽州牧時粵疆未定乃依
幕府流寓五羊城衣敝不完并日而食幸以詩見
重李撫軍稍稍得衣食一日藩邸張讌羣吏紛集
而王所召客惟一施欽州曰今日非宴下吏重詩

人也後復授徒龍灘以自給署程鄉篆悉捐里長
營辦費及抵欽綏輯流亡錄亂兵所棄子女姓氏
榜通衢俾其家領歸陞松江同知與提督馬進寶
相抗馬故驍將欲以氣凌轢使之屈伏嘗置酒帥
府因以巨觥笑曰當令此老醉死明旦令人伺之
則施司馬放早衙矣著有詩史集又有粵遊集觀
海集雄遊集天中集諸編晚年罷官歸里先君子
延至西平署命季友受業焉燈窗雪案古色照人

今登師作不禁三復流涕云

書懷

生年百感餘落落未聞道豈不歷艱辛
河流修且浩征馬嘶春風飛鷹掠秋草
清夢搖旦昏出門傷懷抱帽帽黃鵠心
願依芳樹老

何君出扇頭韓仲生牕竹詩率和

千尺虛庭影根盤斜石生新篁吹午夢
老籜散秋聲月出當軒白風高入畫清
此君終不熱蕭瑟有餘情

九日過十八灘遇兵艘連下

客路重陽日橫帆十八灘
濤聲摧壁立山氣助人寒
過客迷花渚歸師束錦鞍
書生今老矣曾把寶刀看

寄懷增江吳友日

珠江迴棹十年蹤遙望鱗飛百尺松
愛我莫題鸚鵡賦思君重見鷓鴣峰
高樓雨色消兵甲遠樹晴嵐聽鼓鐘
已奏德星還聚井應知膝上有人龍

諸將四首

蓋代聲傳漢將營勞臣千載共知名功成東北來江左
威服西南重楚荆丞相祠堂留古柏昆明池水失長城
即教尚父今猶在無復磻溪釣玉璜

墨綵聲振粵江開銅柱親從擊鼓來載奠金城棲鳳驛
移封珠戶釣龍臺宮庭撤宴投醪賞旗鼓連山拔幟才
誰道賢王偏尚武雄風收盡海天回

樓船同日泛牂牁勲業平分老伏波已有陸生南粵紀
還勞漢主大風歌當年寶玉江聲壯此地珍珠海氣多

何事羽林來鐵騎却教鳴劍走關河

何人海上氣飛揚颯颯金戈入戰場
一旅忽驚新草木三軍重固舊封疆
傳聞羽檄閒書記頻遣梯航抑富商
江岸漫勞橫鐵鎖從天誰不識龍驤

和客子鸚鵡詩

憐爾奇毛賦遠思隔窗宛轉夕陽時
翻身却稱雕欄小記曲偏憎翠管遲
飲瀉銀屏憐客去啄殘金鎖怪人知
聰明若被凡禽笑何日開籠宿鳳枝

感懷

小孤山上大孤山灘下三姑江月灣天柱石峰留客影
一肩風雨過梅關

彭貢生孫貽

孫貽字仲謀號昇仁海鹽人暮生仲子貌魁偉好
詠詩口潤而貪飲人有長鯨之目平生恥為齷齪
士動以古人自命讀書過目成誦為諸生試必冠
軍壬午省試陳子龍已擬元而次場忽作寒熱不

得第遂以貢終有茗齋制藝名噪于時見中原多
事凡憂愁感慨一發於文而詩尤工諸體超秀卓
然成家痛父殉國難乃蔬食簪冠終身不出往往
遊於酒人又喜與兒童嬉戲頗具不羈致所著流
寇志并詩詞樂府共數十卷其佳句如包山云瘦
林時見石渴澗亦生泉雷澤云歸穴龍收雨空梁
鶴伺魚山行云山平雲繞碓雨細犢犁煙踏春云
柴門細草臨漁步花塢斜陽隔磬聲有感云十年

心事揮杯盡百感
身名掩鏡中除夕云行雖負俗
猶佳士劒即無成
喜俠兒出郭云經旬斷客鳥窺
戶三日無詩花笑人海濱云身非鮫客還多淚跡
似閒雲只戀山秋柳云少更幾何無奈老樹猶如
此可堪人崑崙山云黃精採罷春盈握白鶴歸來
雪滿身皆警動可喜

陳章侯畫水滸葉子歌

張吳顧陸之寫真
三子聖矣吳入神
吳後千年有陳子

更開生面尤絕倫觀其下手萬象變神鬼觸案窺尖新
深奇不止在面貌衣摺古硬堆虬鱗丹青所狀必英物
愈拙愈秀無前人雄心恠膽破空出思令盜跖張麒麟
東京橫行草間客三十六彪鬚倒磔宣和佚事譜豺虎
裨官暗火搖脣戟章侯筆縛壯虎鬚白黑蟠屈行蛇蚺
夜闌燈火炯蕭瑟含毫細思垂高簾即今寇盜鋒相軟
煙霧中原亂鳬鴨張曹左革花刺袍安有斯人不弄刀
梁山狂兒握弓笑眉髮槎枒山鬼肖邠人鬪虎杭鬪特

豬奴棄子今英妙細看繡梓情性深寫盡張角黃巢心
真龍智勇猛獸服雲臺畫者曾平林

放鶴洲

籬落遮樵徑林扉纏古藤入門唯見竹掃葉忽逢僧茶
氣生殘竈波光動采菱漁家堤柳外落日挂魚罾

建昌城

白水橫官道青山繞廢城餘民百戰盡落日一江明露
下秋菰斷營空野鶴鳴僕夫已憔悴前路自相驚

社日

竹裏山堂午後開櫻桃酒熟客頻來社中人少宜添燕
春半花多總讓梅畫靜棋聲連竹響香殘雲縷遶牀回
塵緣已絕閒無事抱甕疏畦手自栽

春事

修篁十個半林茶採擷春菰煮露芽插槿預為蘭定界
補泥纔與燕移家鈎簾忽挂初三月品水新澆第一花
午睡未醒山鳥喚木蘭花下日西斜

奉簡真長先輩邨居

塵氛不遣入田家，卧起高雲至晚霞。
却病雲煙為藥物，忘憂姬妾有名花。
山林送客猿司戶，村落無官柳放衙。
欲訪先生問漁父，絳桃樹下竹扉斜。

春郊四首次百旃韻

茗林春雨乍舒旗，立望平蕪枝不移。
啼鴂催殘花萬點，閒愁費盡酒千鵝。
柳陰舟小魚高坐，山月人歸犢倒騎。
行徧空庭無可語，深松獨倚聽黃鸝。

陌上春陰鬪八哥，山樊亂落打巖蘿。
悔隨狂蝶尋蒙叟，願作歌鸚度補陀。
戒酒似紅中執法，拈花還禮大摩訶。
東園新植梨千箇，抱耒宜師老橐駝。

野寺尋僧過午鐘，澗聲恰為小橋衝。
鉤廊屐齒喧于蝶，矮竹花房曲似蜂。
煙樹隔江荒禹廟，山河殘畫愴徽宗。
變名何地堪逃俗，曾向臯橋托債春。

花落晴郊舞亂英，雙文小鳥叫新鶯。
船從紅板橋邊繫，人在綠楊隄上行。
攜妓何須呼杜牧，持杯且復作劉伶。

衰翁不預公家事只自酣歌過一生

百旃有春郊四首走筆索和意在險字相窘也
如韻酬之更選韻之窄於成聲者凡四十餘
得長句十章索和亦如之

拾橡空山友鹿麇草衣反得傲懸鵲鑄刀潛訪眉間尺
賣藥堅辭手不龜紙碓自舂成側理窗梅全乳半生仁
海邊白石多堪煮脫粟何煩更指囷

草喧二月漸飛蟲北牖疎風面竹斤土甑添薪炊石髓

枯毫搨字得顏筋千觴牛飲卑三雅一葉鳴夷笑伍員
誰道貧家絃管缺如簧好鳥故殷勤

幽塍澗落故喧飀晚劖春田得芋魁一入深林猿拜侶
久辭世網雉驚媒雷催蕉葉時供紙雨放燈花未落煤
欲訪名山度江去却憐我馬日虺隤

舊植蓀荃間杜蘅荒庭鋤穢走魑魅酷尋幽壑為量屐
時約山樵與對枰睡旨濃于千日醉菜香清絕五侯鯖
閒居早晚無功課不是詩筒即酒鎔

聞道鷓鴣湖勝若耶綠蓑煙底友魚蝦新鱗出網分鱸膾
野鳥供厨薦鷓鴣梅雨一鑪桑苧火池蛙兩部正平搗
醉眠不復憂天墜鍊石辛勤笑女媧

一竿春水綠平篙小築還當舊馬皞白眼向人高岸憤
青山對我落持螯雨來桑陌收魚笥月上菱田罷桔槔
此外亂離都不問麴生惟勸日鋪饈

梅妻鶴子代姬姜種秫無勞典鷓鴣空谷蘭猶香草莽
卑巢鳥亦戀榆枋名園洛下輸迂叟美酒涼州羨渴羌

卷二十四
惟有此君成莫逆萬竿牕北種篋簍

竹花漠漠曳龍而倒拂風前白接羅香作篆文銘古鼎
闌雕梵字架茶靡提壺鳥勸添栢杓曳布妻能共廢序
盆景小山堪點綴一拳沐雨綠屨屨

欲辭火食採山芋喜怒寧能問衆狙身賤泥塗行郭索
骨寒風雪傲林於箋經老去成書蠹臨帖工來笑墨豬
晨起灌花添硯水汲泉自滴玉蟾蜍

藜羹玉色下春齏飯罷攜琴付小溪身世多虞恒讀易

行藏難卜托扶乩漫同莊惠游濠上莫以彭殤感會稽
無可奈何聊命酒不知醉後奪鸞鏡

野泛

野渡茫茫春暮矣浮萍泛泛去何之迴溪多曲如成字
乳鴨呼名自抱兒出處定師高士傳行藏半在少陵詩
桃花應笑人來晚從此垂竿也未遲

灌園和李潛夫先生

鮭菜長飢未識負茅堂藥圃各清真庭前拾橡猿三口

雨後移花月一身門有好山何必畫徑辭俗客自無塵
穿林歸去常衝晚野老寧煩醉尉嗔

聞鷓鴣

章水東流貢水西鬱孤臺下草萋萋雲山萬里行應徧
山鳥空勞向客啼

燕亭夜雨

夜雨空堦滴綠蕉無眠山客更蕭蕭西風縱有還家夢
難渡潯江八月潮

陸推官濬睿

濬睿字以愚號未菴平湖人長庚之孫順治丙戌
舉人授宣府推官逼居塞上惟以寬簡治之出寬
民羣加世等置悍弁徐洪志于法未幾解綬歸郊
居閒放醉飲陶然凡憂悲愉佚之槩一寓於詩前
後所著彙成十刻行世

蓬萊閣

鞭蜃呼雲雲未起胡然危閣層波裏勢凌泮漭撐虛空

碧眼仙人時戾止仙裾飄忽風颭颭畫棟煙樞春復秋
滄桑轉瞬閣常在欲挽長鯨使倒流

輓錢穉拙

盛年矜意氣同學遜奇才草檄城狐去飛書金馬來多
聞存北史不仕慕南陔故里堪棲托傷心入夜臺

家園小集酬沈存西

秋林初霽雁聲催挈伴登高第一回沼映殘霞留紫在
窗銜遠岫帶青來狂呼隨興鷗能狎痛影忘形菊自開

藉有休文貽絕唱半庭吟思繞蒼苔

遊楊厯巖

五月山田稻放花探奇炎日路偏賒為看古木遙相接
漸見危樓近復遮架屋因巖稱絕壁克厨引礪試新茶
登臨到此塵心豁欲問成公是否沙

巖半有祇霖寺供
成公祖師肉身

吳門竹枝詞

攬勝閒憑悟石軒笛聲忽聽在高原日殘樹黯人歸去
乘興還添小十番

姊妹追隨賽巧粧
艷陽新綠綺羅香
畫船昏黑靈巖轉
明日叮嚀到上方

小遊仙詩

九轉丹砂在玉臺
朝過弱水暮蓬萊
擗麟佐酒無人識
從此騎龍不復來

半竿釣月不驚鷗
神在層霄影在舟
有客錯將漁父喚
數聲長嘯洞庭秋

楊秀才嗣源

嗣源字若谷號疑始平湖諸生有據梧草

遊新昌南明寺

山徑紆迴石磴幽依稀月峽挂當頭仙人棋局今猶在
高嶺乘風暑似秋

蔣布衣之翹

之翹字楚穉號石林居秀水之王江涇初隱於市
廣積書卷當集有明禾中先正詩為詩乘採撫甚
博予頗得其助云著有甲申前後集

杪秋登南樓述懷寄舊遊諸子

忽忽歲方晏，遞緒當廩秋。
嚴霜挫羣卉，悲風掠寒流。
浮雲藹蒼涼，日照天為愁。
鵲鴉一以鳴，中心洵靡瘳。
登高從所思，榛荆障前丘。
聚散固匪常，明晦理乃周。
感往成晞露，撫今若浮漚。
交道日墜地，誰為心相求。
延佇罷觴咏，緘言申離尤。

五人之墓

亭亭山上柏，托根化為石。
頽景掠流飈，危柯歟摧及女。

鬼識妖端羣倫寢夷戮驅梟自南來笈鳳鍛威翮斯人
良獨歎叩閤計無益肉食黽阿從草野憤所切一手撲
殺之聊以禡奸魄論市良慨慷歆血破空碧遺塚何纍
纍石蹠闕阡陌蔓草延綠滋羣鷁吊林夕凜然生魂聚
眉髮猶奕奕白骨蒼苔中時有煙霧積我征屢瞻睇弭
節撫今昔陟懷軹里屠浮羨燕市客爾汝敦古歡捐軀
曷云惜翳惟托深衷非職謀乃國秉性得所甘高風頑
懦激怛怛縻肝腸悲吟淚填臆

泊舟

止櫂知何地攜蓼復有村落花緣艇出鬪鴨近人翻未
乞田家火先邀野老樽百年知幾醉潦倒復誰論

吾拙

候逼寒初至循風欲授衣虛櫺晚照薄藁菊背霜微
鍾悲吾拙乾坤老孰依干戈猶滿眼不敢出柴扉

智標塔絕頂題壁

高標延百里層塔出秋巒拾級青雲直憑闌白晝寒洪

濛尊一氣吞吐恣雙丸下視真卑狹將從問羽翰

平居

何言去國似孤舟失意平居亦蕩流對景未酬陶栗里
攜詩賸得謝宣州蕪葭霞靜寒依渚風雨秋高晚抱樓
時事不禁蕭索盡停杯木落坐颼颼

春日送陸韋公之淮西

乍逢旋別正初春冷落梅花解笑人千里江關謀食計
十年烽火醉吟身交嘗岐路尤堪重文至窮時自有神

漫爾離樽何所指黃雲甲馬故酸辛

宣公祠

唐相祠堂舊楷模蕭蕭梧竹接城隅當年賈誼此其輩
何代能無絳灌徒

閱詩集偶拈絕句

犁眉公洵出羣材源委風騷魏晉來不以作家甘自命
英雄本色待人猜

風雅吾師李慶陽何徐踴躍讓前行若還獨自抒機軸

一句應須倒一觴

嵯峨臺閣當時體七子同聲固擅場自分緣情言所志
後生莫漫薄高陽

姚秀才世靖

世靖字子清號藥師平湖人隱居廣陳之南溪為
詩秀逸一空俗調有翠樾軒稿

今昔行悲老嫗篇

有序

余少失怙以族子見撫於叔父故大司寇公每朔

望一入至陳淑人所見所為傅嫗者主守門既司
寇淑人相次下世不數年子孝廉又殞高臺曲池
半為蔓草傅嫗故在傭于里之豪以食余感其貧
困又以盛衰之故愴然于懷為作今昔行悲老嫗
篇以寄意焉

春風老嫗悲南陌淚如連絲啼不得曾是朱門舊日人
今來宛轉無衣食憶昔尚書全盛時雁行珠履何差池
連雲甲第倚雲漢中有金屋多蛾眉葳蕤鎖鑰黃金鋪

屈戍盤龍雙轆轤南窗北牖隱相望惟容此姬當關呼
晝逐瓊筵洗鑿落夜趨綺帳拂流蘇是時竹馬余翩翩
烏衣伯仲羣少年競賭羅囊走堂下獨成蠟鳳戲堦前
中間令弟托心素春草西堂夢佳句突兀應高定國間
悲涼却掃延年墓一別人琴遂杳然百年書籍終誰付
山陽思舊空笛聲平原歎逝徒詞賦昔日池臺生棘榛
清歌妙舞共灰塵龍鍾白首還淪落乞食常從舊比鄰
吁嗟世事無不有海水蓬萊幾回首茂陵高卧馬相如

終年消渴長著書因風為問青雲客何處紅塵無覆車

春莫曲

江南綠曉天絲香晴渚無人蘭葉長蜂尾嬌獐撲花去
交交鬪鴨迴金塘櫻桃委墜紅珠凍榆莢如錢壓鶯夢
綺榭頻褰銀蒜條湘川一幅簾旌動麝煤小字丁香勻
綠繡羅裳持寄人荆雲蜀雨不知處鯉魚六六腥紅鱗
傾城面背闌干曲淺碧海綃春一束樓外鞦韆拂地垂
煙紗漠漠啼香玉

江亭

地僻閉門久草深花滿臺夕陰連海潤江漲鬱春雷鳥
啄蒲苗下魚翻荇葉來虛亭捲簾坐遲客共新醅

客至

頗似嵇康懶經旬一上臺清齋寒食過多病故人來草
愛春陰合花看暮雨開相將話殘燭夜半有輕雷

十七

十七始登樓垂簾不上鉤與郎香蔽膝報妾玉搔頭寶

鏡開明月羅裙剪石榴畫眉何太晚人為早朝留

自解

五十王融較半非高陽窮鬼沉因依直教蕪穢連荒徑
更遣飄搖到敝衣白髮漸生妻子笑黃金欲盡故人稀
只餘賦草為雲氣山雨來時千丈飛

憶舊

十三詞賦已知名日日金丸逐曉鶯楊柳河橋春試馬
杏花樓閣夜聞箏當年斷夢隨寒雨幾處傷心為月明

最是紅顏易零落秋風黃葉悵平生

東平詩百首之二

簾前倚醉一悲歌自捲蝦鬚入綺羅紅燭背人偷驗取
研繚綾上舊恩多

墉宮背燭幾淒淒傳與青衫驗舊啼二十七年惆悵事
春風開遍野棠梨

黃貢士子錫

子錫字復仲秀水人承吳次子善畫山水有麗農

山人遺藁

艷曲

學織九張機香羅疊舞衣輕鷺千二百風起盡翻飛
湖中並蒂蓮岸上同心苳三十六鴛鴦飛來不飛去

鍾貢士欽立

欽立字宣遠秀水人明末貢生

折楊柳

裊裊金堤柳三春漸寂寥新聲傳洛下舊恨憶河橋妾

意愁飛絮君行憶舞腰
關山吹短笛憑向曲中飄

秋涇晚發

落日片帆輕春江一望平
微風三十里已度射襄城
岸楊柳接村村布穀鳴不
愁明發雨魚尾斷霞生

查秀才崧繼

崧繼字柱青後更名遺字
逸遠號學圃海寧人補
海鹽縣學生有澄清堂集

揚州詞

江都士女蕩輕舟傳說當時翠輦留二十四橋人散後
風吹螢火徧邗溝

金秀才蒯孫

蒯孫字龍友秀水縣學生有鐵巖集

詠懷

萬籟吹至音悅耳非絲竹至道有餘甘所懽非梁肉衣
被蓋天下何必綺與縠貴固非吾榮賤亦非吾辱粟
同履冰粥粥若捧玉毫髮苟有違澣水終難濯

瑩篴且莫彈簫管且莫吹俯仰懷古昔戚戚心若摧
陽被謠詠湘沅萬古悲讒夫自高張楚臣蒙鵠夷卓哉
蘇子卿噉雪志難移翩翩夷門客頭顱酬所知下士羨
朝榮朝榮難自持上士希延年延年安可期壽夭同一
歸惟貴死得宜歎彼泉下人生氣何纍纍

正德宮詞

月射窗紗映畫梁芙蓉闕北鬱金香西宮今夜停歌舞
聞道官家宿豹房

天啓宮詞

玲瓏玉束繫鮫綃素腕雙擎碧玉簫萬壽山頭歌急拍
一聲聲唱雒陽橋

崇禎宮詞

雉扇乘雲啓鳳樓特宣命婦拜長秋賜來穀雨新茶白
景泰盤盛宣德甌

馬教授廣軫

廣軫字飛生平湖人鳴雷子為人外通中介尤長

辨才每當詩酒遊讌賓友歛集輒葛巾鹿裘高談
雄論連舉觥船數十神氣自若喪亂後家益貧遂
遊于四方以教授為事凡理學性命興亡治亂之
說矢口講論間以笑謔多有別解使人靡靡忘倦
於是三吳之士咸歸其門翕然有大儒風歿後私
諡端敏

詠懷

貧者思得玉不採九疑峰倦者思得息不憩三危蹤嗟

彼當路子追欲何怔忡朝菌與靈椿誰是金石躬惟有
樂飢水可以安吾慵

康樂誇成佛叔夜急養生當其抗言時髣髴通神靈一
朝不自得終乃違其情我欽蒙莊子無近刑與名時哉
適來去躬耕以為經

養由方矯矢白猿號平林更羸鳴虛弓雲中下驚禽末
技有至妙神感捷應心何為耽道久徒然歎幽深逝將
舍之去翱翔南山岑

懷培原大兄行脚雪竇

廿載投簪老上方三年讀禮祝空王
寧求慧業無生果不為名山一瓣香
片石舊尋蓮社地孤雲重度越吟鄉
自傷未免周何累薇蕨徒懷向首陽

同臯旭對月懷沈子佩臨別勝集

愛客當年舊隱侯短亭落日更維舟
臨歧細草迷吳角隔歲殘梅下隴頭
才子最憐黃綬好酒人偏愛翠眉愁
年來却笑文通老別賦時時戀舊遊

莫春雜感同葉星期郭臯旭

長洲臺苑一蕪平
細雨青霏草色輕
華表思歸君子鶴
空山有語上皇鸚
要離塚畔尋家國
林慮傭間識友生
回憶舊京歡賞處
何人不發五噫聲

沈秀才廷鈺

廷鈺字文韓號山漁桐鄉庠生甲申後棄去就情
詩酒其自序有云屈原賦離騷宋玉作九辯憂國
既深悲秋特甚余生不敏觸物多忤憂與時過病

復隨之著秋吟詩以見志

秋深水墩訪菊次同遊諸子韻

高風吹枯枝葉葉去無迹
日色蒼蒼涼溪流泯泯白
每覺秋興悲我意偶閒遠
采采黃金花衆芳羅咫尺
登危據層樓千里接瑤席
水迴地勢雄徑轉秋田斤
決背數歸鴻影下寒塘隼
煙色隨雙帆歷歷漁樵宅
霜飛百草凋節序忽遷易
良會當及時何得拘形役

漸川老人俞汝言

汝言字右吉秀水人，身矮，善談謔，為諸生不遇。自稱漸川老人，遊燕趙韓魏宋衛閩粵之鄉，越雲中雁門，歸而閉戶著述。篇帙之富，近代學人莫與抗衡者。有《漸川集》及《先儒語要》、《京房易圖》、《晉軍將佐表》、《禮服沿革》、《漢官差次考》、《宋元舉要》、《歷紀年同聲錄》、《崇禎大臣年表》、《卿貳表明世》、《家考》、《寇變略》、《弇州三述》、《補品級》、《廣考》、《嵩山志》、《謚法考》、《補雙湖雜錄》、《本草摘要》、《晚又著春秋平義》十二卷、《四傳糾正》一卷。

坐是兩目失明然猶口授諸書使人以筆記之遂
病而卒予憶戊申己酉之歲右吉至西平署下帷
甚久予雖少每於燈窗硯席間執卷商確頗以為
孺子可教而今重有典型之悲矣所登諸詩皆昔
年手錄者惜不得覽其全集

詠懷

長安遊俠地洛陽粉黛叢朱樓結綺疏繡帳臨春風皎
皎垂素手琅琅振絲桐一為求鳳操車馬塞道中回首

四節易凝霜凋朱容明月猶在懸白日已不東翩翩白
馬郎揚鞭復何從

東村宿瘤姑十五被翟章西家美羅敷二十猶蠶桑窈
窕絕世姿終日工七襄容色豈在好逢時即為良語賤
有餘惡處貴固不減紅顏坐消歇盛年何可常

二子篇貽顧寧人李天生

邊郡諸侯誰好士雲中雁門稱第一同開幕府向陰山
共脫貂裘禮賓客笳閒鼓卧烽息煙尊罌楚楚屏箏瑟

甲朝丙夜恣探論如石投水膠在漆鄰下梁園彼一時
安論軒車與遺佚就中賓客誰最奇惟顧朱李無異辭
朱子自小我好友顧李未面神為馳關中博物因篤冠
操管滔滔濯江漢劉曹沈宋未足多古詞鬱鬱星辰爛
東吳布衣顧炎武山經星志指掌數古文穿穴鄙夾漈
冥搜碑版考石鼓好奇尚俠大略同李詩顧筆同千古
余來雲中踰萬里貪與諸君共抵几誰知聚散自有時
南北東西不並屣李生貽我懷古篇朱生書尺嘗蟬連

遊燕幸與顧子俱我出顧入無後先均是山澤姿並為
諸侯友記程未嘗隔千里片席劇談竟何有乃知造物
甚相忌合并從容亦難偶只今幕府一時歇散去燕吳
與秦粵此生寧有聚首期各自孤眠對秋月不爾單父
與吹臺高李杜陵俱異才嘯歌今昔乾坤開英雄奚必
非蒿萊二子相見定有日麟遊鳳舞何時哉

雲中雜詩

蘇武臺安在昭君墓若何垣非秦紫塞堡近漢黃河兵

減笳吟少烽銷牧地多當時歌舞麗檀板雜琯戈

贈孫孝廉侍史谷音

侍史清如玉疑從緹嶺來才偏憐穎士技欲勝方回眉
語令人醉歌停待客催何當蒙繡被青翰一帆開

井陘道中

束馬嶽崎道路艱尚留古迹在青山懸流苔洗將軍壘
落日煙封娘子關垂黍秋田辭戰伐橫碑古澗費追攀
兩看旅雁違江北自愧征衫不暫閒

華嚴寺同閻古古作

玉甃金繩奠九楹
離宮拓跋舊西京
幾經鐵馬琱戈日
不壞毘盧舍衛城
像試孰開山後地
法幢猶紀大康名
請看直北諸陵闕
白草黃榆縱復橫

進艇

晴川曲曲抱沙堤
岸柳依依遠近齊
山色欲開疎雨外
夕陽愁在亂峰西
舟前波浪洑流駛
望裏煙嵐魯樹低
作客乘春行處好
故鄉曾否息征輶

大名九日

搔首中原去雁號
帝丘景物倍蕭騷
愁歌白帽清霜逼
風捲黃河濁浪高
在野樓臺臨大澤
摩天鵬鷃見秋毫
射熊戲馬何年事
聞道漁陽羽騎勞

鄴中懷古

漳河清濁太行東
此地曾聞霸業隆
川岳無心悲鼓角
丘原何處問英雄
關雞閱馬興亡外
冰井銅臺涕淚中
獨有牽波雲表立
鈴音獨語向西風

大同曲

纏頭窄袖奏冰絲促柱繁聲斂翠眉道是武皇遺樂府
一時齊唱玉娥兒

沈秀才克家

克家字慶仲秀水人德符子順治中諸生

壬午秋雨中訪石齋先生

共快其濛雨公來亦自東子輿友天下弘景相山中練
界千峰瀑松承衆壑風時賢無大小于邁總從公

朱布衣廂

廂字開仲嘉興人弱齡多病終其身不婚閒賦小
詩自娛而已

簡吳生

自誦梅花人日詩五句不見但相思一春多雨愁無麥
二月輸官定賣絲行藥橋邊逢客返著書牕下少人知
近傳孺子司村社想見癯豪割肉時

彭秀才孫繩

孫繩字子羽海鹽人長宜子少穎異無閼閼氣著
有問業居集

國初避兵豐山扶母潛匿復出而求父遇害年僅二十

六

同青雷夜宿雲岫

岩巖精舍倩雲封遙叩禪扉聽晚鐘龍護香臺時卧鉢
鶴依錫杖欲巢松風泉落戶秋生枕寒月凝霜晚在峰
夜半梵音清客思起從老衲問三宗

戴長汎

長汎字澄齋嘉興人有前後征草

茗溪漫步

四野干戈急蕭條此地秋村
虎吠山鬼水鳥狎溪牛落
葉飛重起哀湍咽更流無才
堪濟世祇合老林丘

胡秀才嗣璜

嗣璜字映日平湖人自號蘭菊主人著墨龕詩清
絕無點塵不屑為外人示也

喜雨

忽已脫炎氛羲皇我亦云樹屯煙作障溪篆藻成文助
懶噴冰簟分涼頌海雲偶懷青李帖未敢漫書裙

古有扇對格偶賦及之

自信迂疎不世情遣懷惟倩墨為卿大椿空語八千歲
且及芳華進竹罌弱水縱圓三萬里每從清夢聽瑤笙
但能默坐胸如雪梨棗于中亦漸生

雨久

雲容何事墨成堆，豈有新詩待雨催。
魚慣淺波驚白浪，樹留殘蒂怨黃梅。
式相好是松根筆，可與言惟鵲子杯。
我欲曝書方數卷，啼鳩聲裏又輕雷。

鄭秀才興誦

興誦字覺初，桐鄉庠生。世居柞溪，徙青鎮。下帷寶閣僧院二十餘年，著作等身，兵燹後散佚不傳。

同友人分水墩卽事

半畝花宮一水浮，同人乘興共停舟。
樓銜越浦芙蓉老，

門接吳雲薜荔幽紅醕光搖鸚鵡酸白蘋風度鷗鷺裘
幾聲漁笛前村晚卜夜還看月映洲

附考烏青分水墩萬厯初同
知羅公斗築其東有永鎮巷

沈貢士嗣選

嗣選字仁舉號果庵嘉興貢生乙酉奉母避兵葭
川羣盜知為老孝子戒弗犯破產聚書嘗以歷代
文章惟南宋無選本乃輯續之其自著曰儉娛堂
集卒年七十六私諡孝貞

鄉居

不識揚雄字無人載酒來
閒窗封薜荔仄徑長莓苔
啼足鳥飛去落殘花更開
悠哉聊卒歲興到獨銜杯

感事

長安車馬競通津
西市衣冠血尚新
白首同歸成底事
青山獨往竟何人
華亭夜月堪聞鶴
水國秋風好憶蓴
竊歎當年朱長史
可能重負會稽薪

雜感二首

當年曾結竹林盟
邑里爭傳月旦評
意氣直教周士貴
文章能使古人生
一從歲有龍蛇厄
幾度春聞鶉鴉聲
此日相思弔嵇阮
酒壚鄰笛不勝情

少年聲氣接羣英
湖海飄零異死生
偶簡姓名堪墮淚
傳來事迹總關情
春風玉樹先賢塚
秋露金莖故國城
垂老瑟居無客至
滿庭衰草候蟲鳴

陸布衣森立

森立字中卿號嵩石
平湖人庶使鰲孫
長身好讀

書工寫山水吟不甚富而清婉有致卒年三十九
子琰卓亦高尚能詩

錢塘

風湧銀濤勢欲狂萬山空自削蒼茫非關客思無聊賴
十月天寒正隕霜

陳秀才恪

恪字子肅一字威如嘉興學生恂之弟有瞿菴詩
草

九日風雨作

風雨淹重九幽人得自娛東籬花罷采下若酒停沽已
免題餒字真成潑墨圖登高何處望新漲滿江湖

何畫士園客

園客字間仙海鹽人長於丹青

元日

幽居鄰碧里淑氣轉青陽老畏今朝至貧看去日長衣
裳任顛倒兒女異存亡誰惜頭如雪栖栖當道傍

沈秀才中琛

中琛字獻臣平湖人中柱弟少有文名晚偕李潛
夫馬允培兩先生作方外遊有抱一軒吟稿

山中歸晤允培即訂明春入山之期

入山尋舊約出谷訪名賢怪石橫窺磴長松上拂天
歲時從漢臘耕鑿詠堯年好句春光燭相期漱碧泉

仲秋日懷木菴全李潛夫馬允培聯句賦得南

山當戶牖用十七篠韻

精廬臨澄溪夕陽展晴眺漸覺秋氣深

夫潛

能令客思渺

蒼涼自南來

夫潛

蜿蜒還東繞遙青隱雲間

夫獻

瑞靄浮天

表松風到良宵

夫潛

海日遇清曉一望極平原

夫潛

千尋浴

芳沼郊原雨乍收

夫獻

川谷流方淼虛窗接綠蕪

夫潛

小艇

迷紅蓼栖巖淨瘴煙

夫潛

開徑移霜篠懷人夢轉孤

夫獻

傷

往情何悄憂來事薄吟

夫潛

譚罷澆清醪良晤尚可期賦

歸興未了

夫潛

褚秀才連時

連時字青還嘉興縣學生

崇禎宮詞

日日南薰殿風簫缸初進海榴紅新調於變時雍曲
詔許中書譚殿中

王拔

拔字人表嘉興人

秋懷

天清玉露下寒河連騎蕭蕭薄暮過萬里風高鷹羽健

千家月落杵聲多故園鋤草留殘菊古陌輸租刈晚禾
不是秋深貪習靜畏聞野老說干戈

吳祖錫

祖錫字佩遠一名鉏字稽田秀水人

信陵君墓

六國安危只繫君握符兩度抑秦軍一九幾徹函關土
五色徐飛芒碭雲未見特牛陳大祖暫將醇酒酌高墳
可憐異代存毛薛徒倚夷門到夕曛

朱復

復一名臨字淪六又字載陽嘉興人

七夕

城頭涼月到溪亭
銀漢無光掩鵲翎
可怪女牛終古渡
不愁化作老人星

金甌

甌字完城一字寧武秀水人

春晚

竹杖筠車處處山遊人日日看花還縱然紅紫風吹盡
依舊鳴禽綠樹間

俞昱

昱字宣夏嘉興星河里人父振紀童年葬母負土
成墳慈烏巢焉至今人稱孝烏塚四句乏嗣司命
錫以多男之兆果連舉五子昱篤學好古有茗柯

堂集

子夜歌

歡來天未曙歡去雲將雨
椒子落水中一身耽辛苦
知歡是白日一別終夜寒
野梅結三子那曉憐心酸

吳自求

自求字永言嘉善人

送唐闇思先生

朔風吹雪上征裾去國投荒萬里餘
候雁已南君更北不知何處寄鄉書

范風仁

風仁字梅隱嘉興人

秋日村居

一川秋色淨蘆葭南浦風多日易斜
越客夢隨江上雨山城月照柳梢鴉
濱洲有曲翻漁譜蟹舍無人落藕花
秋水滿湖閒縱櫂市喧應不到農家

吳晉

晉字畫三別號謙庭嘉善人

題大兄別業

阿兄買斷牆東地
蜨舞花深署以庵
夢叶池塘來小弟
坐消秋暑抵精藍

杜涇

涇字晚實一字鄰若嘉興人

塞上


旌旗當落日絕塞陣雲橫
曉角驚寒雁孤煙照暮城
河水驅馬渡隴草逐人行
戰骨悲沙漠年年古北平

蔣人

人字公凡一字昭遺嘉興人

惠陽除夕

十年當此夕強半在天涯異地重為客殘冬未到家歌
聞蠻調苦燭暗海風斜更見梅花發能無感歲華



樵李詩繫卷二十四